

學政全書

一二

五	漢書門
一四七	
四〇九	
五	
冊架函號類	

二九六	五	漢
一四	一七五	書
四		

內閣文庫
書號 漢 5175
冊數 4 (1)
函號 296 110

政書 七五

296-110



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





589-1

欽定學政全書總目

卷一

謨訓

學規

董戒

優恤

書籍

卷二

文體

淺草文庫

欽定學政全書

總目

學宮事宜

學政事宜

提學按臨

考試事例

場規

卷三

考試出題

生童試卷

閱卷

童生入學

發案發落

幫補廩增

各項貢生

卷四

學制員額

卷五

旗學

遼學

商學

衛學

土司學

卷六

別籍寓學

附隨任入學

生員優劣

懲治生監

生員丁憂服闋告假

改者復姓

捐納監生

季考月課

卷七

考覈教官

各省學政事宜

解卷解冊

提學報滿交代

宗學

官學

書院

社學

義學

卷八

鄉約

鄉飲酒禮

名宦鄉賢

奉祀生

贊禮生

樂舞生

欽定學政全書卷之一目錄

謨訓

學規

董戒

優恤

書籍

一。生員之家。父母賢智者。子當受教。父母愚魯。或有非為者。子既讀書明理。當再三懇告。使父母不陷於危亡。

一。生員立志當學為忠臣清官。書史所載忠清事蹟。務須互相講究。凡利國愛民之事。更宜留心。

一。生員居心忠厚正直。讀書方有實用。出仕必作良吏。若心術邪刻。讀書必無成就。為官必取禍患。行害人之事者。往往自殺其身。常宜思省。

一。生員不可干求官長。交結勢要。希圖進身。若果心

善德全。上天知之。必加以福。

一。生員當愛身忍性。凡有司官衙門。不可輕入。即有切已之事。止許家人代告。不許干與他人詞訟。他人亦不許牽連生員作證。

一。為學當尊敬先生。若講說皆須誠心聽受。如有未明。從容再問。毋妄行辨難。為師亦當盡心教訓。勿致怠惰。

一。軍民一切利病。不許生員上書陳言。如有一言建白。以違制論。黜革治罪。

一。生員不許糾黨多人。立盟結社。把持官府。武斷鄉曲。所作文字。不許妄行刊刻。違者。聽提調官治罪。

康熙四十一年。

御製訓飭士子文。頒行直省各學。

國家建立學校。原以興行教化。作育人才。典至渥也。朕臨御以來。隆重師儒。加意庠序。近復慎簡學使。釐剔弊端。務期風教修明。賢才蔚起。庶幾樸棧作人之意。乃比年士習未端。儒效罕著。雖因內外臣工奉行未能盡善。亦由爾諸生積錮已久。猝難改易之故也。茲特親製訓言。再加警飭。

爾諸生其敬聽之。從來學者先立品行。次及文學。學術事功。源委有敘。爾諸生幼聞庭訓。長立宮牆。朝夕誦讀。寧無究心。必也躬修實踐。砥礪廉隅。敦孝順。以事親。秉忠貞。以立志。窮經考業。勿雜荒誕之談。取友親師。悉化驕盈之氣。文章歸於醇雅。毋事浮華。軌度式於規繩。最防蕩軼。子衿挑達。自昔所譏。苟行止有虧。雖讀書何益。若夫宅心弗淑。行已多愆。或蜚語流言。挾制官長。或隱糧包訟。出入公門。或唆撥奸猾。欺孤陵弱。或招呼朋類。結社要盟。乃如之人。名教不容。鄉黨勿齒。縱倖脫褫。扑濫竊章。縫返之於衷。寧

無愧乎。况夫鄉會科名。乃掄才大典。關係尤鉅。士子果有真才實學。何患困不逢年。顧乃標榜虛名。暗通聲氣。夤緣詭遇。罔顧身家。又或改竄鄉貫。希圖進取。囂陵騰沸。網利營私。種種弊端。深可痛恨。且夫士子出身之始。尤貴以正。若茲厥初。拜獻便已作奸犯科。則異時敗檢踰閑。何所不至。又安望其秉公持正。爲國家宣猷樹績。膺後先疏附之選哉。朕用嘉惠爾等。故不禁反覆惓惓。頒茲訓言。爾等務共體朕心。恪遵明訓。一切痛加改省。爭自濯磨。積行勤學。以圖上進。國家三年登造。束帛弓旌。不特爾身有榮。卽爾

祖父亦增光寵矣。逢時得志。寧俟他求哉。若仍視爲具文。玩愒勿儆。毀方躍冶。暴棄自甘。則是爾等冥頑無知。終不能率教也。旣負栽培。復干咎戾。王章具在。朕亦不能爲爾等寬矣。自茲以往。內而國學。外而直省鄉校。凡學臣師長。皆有司鐸之責者。並宜傳集諸生。多方董勸。以副朕懷。否則職業勿修。咎亦難追。勿謂朕言之不預也。爾多士尚敬聽之。

雍正三年。覆准。士子誦習。必早聞正論。俾德性堅定。

將

聖諭廣訓萬言諭

御製朋黨論頒發各省學政刊刻印刷齎送各學令司鐸之員朔望宣誦

御製朋黨論

朕惟天尊地卑而君臣之分定爲人臣者義當惟知有君惟知有君則其情固結不可解而能與君同好惡夫是之謂一德一心而上下交乃有心懷二三不能與君同好惡以至於上下之情睽而尊卑之分逆則皆朋黨之習爲之害也夫人君之好惡惟求其至公而已矣凡用舍進退孰

不以其爲賢而進之以其爲不賢而退之惟或恐其所見之未盡當也故虛其心以博稽衆論然必衆論盡歸於至正而人君從之方合於大公若朋黨之徒挾偏私以惑主聽而人君或誤用之則是以至公之心反成其爲至私之事矣孟子論國君之進賢退不肖旣合左右諸大夫國人之論而必加察焉以親見其賢否之實洪範稽疑以謀及乃心者求卿士庶民之從而皇極敷言必戒其好惡偏黨以歸於王道之蕩平正直若是乎人君之不自用而必欲盡化天下之偏私以成大同也人臣乃敢溺私心樹朋黨

各徇其好惡以爲是非。至使人君懲偏聽之生奸。謂反不如獨見之公也。朋黨之罪。可勝誅乎。我

聖祖仁皇帝御極六十年。用人行政。邁越千古帝王。而大小臣僚。未能盡矢公忠。往往要朋結黨。

聖祖戒飭再三。未能盡改。朕卽位以來。屢加申飭。而此風尚存。彼不顧好惡之公。而徇其私暱。牢不可破。上用一人。則相與議之曰。是某所汲引者也。於是乎遠之若浼。曰。吾避嫌也。不附勢也。爭懷妒心。交騰謗口。以媒孽之。必欲去之。而後快。上去一人。則相與議之曰。是某所中傷者也。親暱

者爲之惋惜。疎遠者亦慰藉稱屈。卽素有嫌隙者。至此反致其殷勤。欲借以釋憾而修好。求一人責其改過自新者。無有也。於是乎其人亦不復自知其過惡。而愈以滋其怨上之心。是朝廷之賞罰黜陟。不足爲重輕。而轉以黨人之咨嗟歎息爲榮。以黨人之指摘詆訾爲辱。亂天下之公是公非。作好惡以陰撓人主予奪之柄。朋黨之爲害。一至是哉。且使人主之好惡。而果有未公。則何不面折廷爭。而爲是陽奉陰違。以遂其植黨營私之計也。書曰。予違汝弼。汝無面從。退有後言。當時君臣告語。望其匡弼。而以面從後

言爲戒。夫是故一堂之上。都俞吁咈。用能賡歌拜颺。以成太和之運。朕無日不延見群臣。造膝陳詞。何事不可盡達。顧乃默無獻替。而狡獪叵測。蓄私見以肆爲後言。事君之義。當如是乎。古純臣之事君也。必期致吾君於堯舜。而人君亦當以堯舜自待其身。豈惟當以堯舜待其身。亦當以皐夔稷契待其臣。孟子曰。責難於君。謂之恭。陳善閉邪。謂之敬。吾君不能。謂之賊。夫以吾君不能。而謂之賊。則爲君者。以吾臣不能。亦當謂之忍。語云。取法乎上。僅得乎中。苟不以唐虞君臣相期待。而區區效法。僅在漢唐以下。是烏

能廓然盡去其私心。而悉合乎大公至正之則哉。宋歐陽修朋黨論。創爲異說。曰。君子以同道爲朋。夫罔上行私。安得爲道。修之所謂道。亦小人之道耳。自有此論。而小人之爲朋者。皆得假同道之名。以濟其同利之實。朕以爲君子無朋。惟小人則有之。且如修之論。將使終其黨者。則爲君子。解散而不終於黨者。反爲小人乎。設修在今日。而爲此論。朕必飭之以正其惑。大抵文人掉弄筆舌。但求騁其才辯。每至害理傷道。而不恤。惟六經語孟。及宋五子傳註。可奉爲典要。論語謂君子不黨。在易渙之六四。曰。渙其群。元

吉。朱子謂上承九五。下無應與。爲能散其朋黨之象。大善而吉。然則君子之必無朋黨。而朋黨之必貴解散。以求元吉。聖人之垂訓。亦旣明且切矣。夫朋友亦五倫之一。朋黨不可有。而朋友之道不可無。然惟草茅伏處之時。恒資其講習。以相攸助。今旣登朝蒞官。則君臣爲公義。而朋友爲私情。人臣當以公滅私。豈得稍顧私情。而違公義。且卽以君親之並重。而出身事主。則以其身致之於君。而尚不能爲父母有。况朋友乎。况可藉口於朋。以怙其黨乎。朕自四十五年來。一切情僞。無不洞矚。今臨御之後。思移風易俗。

躋斯世於熙皞之盛。故兼聽並觀。周諏博採。以詳悉世務。且熟察風俗之變易與否。而無知小人。輒議朕爲煩苛瑣細。有云。人君不當親庶務者。信若斯言。則臯陶之陳謨。何以云。一日二日萬幾。孔子之贊舜。何以云。好問好察。此皆朋黨之錮習未去。畏人君之英察。而欲蒙蔽耳目。以自便其好惡之私焉耳。朕在藩邸時。坦易光明。不樹私恩小惠。與滿漢臣工。素無交與。有欲往來門下者。嚴加拒絕。

聖祖見朕居心行事。公正無私。故令纘承大統。今之好爲朋黨者。不過冀其攀援扶植。緩急可恃。而不知其無益也。徒

自逆天悖義以陷於誅絕之罪亦甚可憫矣。朕願滿漢文武大小諸臣合為一心共竭忠悃與君同其好惡之公恪遵大易論語之明訓而盡去其朋比黨援之積習庶肅然有以凜尊卑之分歡然有以洽上下之情虞廷賡歌颺拜明良喜起之休風豈不再見於今日哉。

上諭十六條。

聖諭廣訓萬言諭開載鄉約項下。

乾隆五年

頒發諭旨訓飭士子勒石太學。

上諭士為四民之首而太學者教化所先四方於是觀型焉。比者聚生徒而教育之董以師儒舉古人之成法規條亦既詳備矣。獨是科名聲利之習深入人心積重難返。士子所為汲汲皇皇者惟是之求而未嘗有志於聖賢之道。不知國家以經義取士使多士由聖賢之言體聖賢之心正欲使之為聖賢之徒而豈沾沾焉文藝之末哉。朱子同安縣諭學者云學以為己今之世父所以詔其子兄所以勉其弟師所以教其弟子弟子之所以學舍科舉之業則無為也使古人之學止於如此則凡

可以得志於科舉斯已爾。所以孜孜焉愛日不倦。以至於死而後已者。果何爲而然哉。今之士。惟不知此。以爲苟足以應有司之求矣。則無事於汲汲爲也。是以至於惰遊而不知反。終身不能有志於學。而君子以爲非士之罪也。使教素明於上。而學素講於下。則士者固將有以用其力。而豈有不勉之患哉。諸君苟能致思於科舉之外。而知古人之所以爲學。則將有欲罷不能者矣。觀朱子此言。洵古今通患。夫爲己二字。乃入聖之門。知爲己。則所讀之書。一一有益於身心。而日用事物之間。存

養省察。闇然自修。世俗之紛華靡麗。無足動念。何患詞章聲譽之能奪志哉。况卽爲科舉。亦無碍於聖賢之學。朱子云。非是科舉累人。人累科舉。若高見遠識之士。讀聖賢之書。據吾所見。爲文以應之。得失置之度外。雖日。日應舉。亦不累也。居今之世。雖孔子復生。也不免應舉。然豈能累孔子也。朱子此言。卽是科舉中爲己之學。誠能爲己。則四書五經。皆聖賢之精蘊。體而行之。爲聖賢而有餘。不能爲己。則雖舉經義治事而督課之。亦糟粕陳言。無裨實用。浮僞與時文等耳。故學者莫先於辨志。

志於爲己者。聖賢之徒也。志於科名者。世俗之陋也。國家養育人材。將用以致君澤民治國平天下。而囿於積習。不能奮然求至於聖賢。豈不謬哉。朕膺君師之任。有厚望於諸生。適讀朱子書。見其言切中士習流弊。故親切爲諸生言之。俾司教者知所以教。而學者知所以學。欽此。

學規

一。各提學官督率教官生儒務將平日所習經書義理。著實講求。躬行實踐。不許別創書院。群聚徒黨。及號召他方遊食無行之徒。空談廢業。因而起奔競之門。開請托之路。違者提學御史聽都察院處分。提學道聽巡按劾奏。遊士人等問擬解發。

一。孝弟廉讓。士子立身大節。有敦本尚實。行誼表著者。提調官細加體察。取具本學師生及本族鄰里甘結。申送提學。覈實卽加獎賞。以勵頽俗。若有平日不

務學業。囑托把持。武斷包攬。或捏造歌謠。興滅詞訟。及敗倫傷化。過惡彰聞者。體訪得實。不必品其文藝。卽行革黜。但行優者。不許通同賄冒。行劣者。不許徇情姑息。併不許輕信開送。致被挾私中傷。違者。一併從重叅處。

一。府州縣提調官員。宜嚴束生徒。按季考校。凡學內殿堂齋房等屋損壞。卽辦料量工修理。其齋夫膳夫。學糧學田等項。俱要以時撥給。不許遲誤剋減。生員除干謁瀆擾外。俱宜以禮相待。勿得橫肆凌侮。至於非禮諂諛。嚴行禁斥。

一。該管有司官。於諸生進見。須設立門簿。詳悉填造。或公事入。或私事入。悉登姓名。或自構訟。或爲人訟。或自爲證。或被牽證。全載情節。其有事不干已。輒便出入衙門。乞恩網利。議論官員賢否者。許卽申呈提學官。以行止有虧革退。若糾衆扛幫。聚至十人以上。罵詈官長。肆行無禮。爲首者。照例問遣。其餘不分人數多少。盡行黜革爲民。

一。淡薄質素。儒者家風。如以浮靡輕佻相高。縱酒宿

娼蕩閑越檢自等於市井少年之輩有犯必黜不得少貸凡遇

聖節元旦冬至及丁祭一應禮儀務須整齊嚴肅有高臥不赴與舛錯驕蹇者即行責治至於謁見上官毋失禮毋足恭務須循循雅飭師生教學胥此可覘

順治十二年奉

上諭各學生員令提學御史提學道嚴飭府州縣衛各學教官月加課程不得曠廢亦不得假借督課陵虐諸生其歲考科考場中原卷解部稽察不許換卷謄改仍將各學廩

增附名數細查在學若干黜退若干照數冊報出示各該府州縣衛張掛俾通知的確姓名然後優免丁糧
順治十六年奉

上諭士習不端結社訂盟把持衙門關說公事相煽成風著嚴行禁止以後有犯者該學臣即行黜革叅奏學臣徇隱事發一體治罪

又題准各省有惡衿身列黷官見充書吏者著該督撫按究革問罪其生員內有原係積年衙蠹經犯罪名者提學嚴查不時除革治罪應考童生有現在衙

門應從朦朧應試者嚴查重治廩生教官扶同保結者併行議處

順治十八年題准凡紳衿貢監在地方抗糧不納并伊兄弟親戚宗族包攬串同倚勢不完及廢紳黜衿

抗糧不納者嚴挈解京送刑部照悖旨例從重治罪如

旨到完納免其提解議處

康熙三十九年覆准直隸各省奉有欽頒

上諭十六條每月朔望地方官宣讀講說化導百姓今士子

亦應訓飭恭請

御製教條發直省學宮每月朔望令儒學教官傳集該學生員宣讀訓飭務令遵守如有不遵者責令教官并地方官詳革從重治罪

康熙四十一年

御製訓飭士子文頒行直省各學

雍正元年覆准學宮之內廣置齋舍多設廩膳凡屬生員苟能勤加課藝互相砥礪則親師取友裨益良多乃終年不至學宮其與教官相往來者不過修歲

時餽贈之儀。無關於講習討論之事。欲求積學之士。豈可多得。著直省學臣。通飭府州縣衛教授。學正。教諭。訓導。務立課程。令其時至學宮。面加考試。如果有遊學遠館。隨任等情。教官亦不得借此苛求。以滋煩擾。至於新進生員。尤爲入德之始基。進身之初級。豈可使身無檢束。聽其遊蕩。應照國子監坐監之例。令其在學舍肄業。俟下案新生至學。爲滿。或有親老家貧。勢不能在學肄業者。亦必分題考核。每月定期幾次。使無曠業。倘有董率不嚴。怠於考課者。學臣於歲科考時。卽以文章之優劣。定教職之賢否。

雍正三年。覆准士子糾衆結社。於人心風俗。實有關係。應飭令直隸各省督撫學臣。嗣後除宿學之士。授徒講學。及非立社訂盟。實係課文會考。無論十人上下。俱無庸議外。如有生監人等。假托文會。結盟聚黨。縱酒呼盧者。該地方官。卽行拏究。申請斥革。其有遠集各府州縣之人。標立社名。論年序譜。指日盟心。放肆爲非者。照奸徒結盟律。分別首從治罪。如地方官知而故縱。或被科道糾叅。或被旁人告發。將該管官。


一併從重議處。

雍正五年。覆准。貢監既令學臣約束。應照依生員之例。令州縣官設立門簿。凡貢監出入衙門。逐一填造。每月申報督撫學政。嚴加查核。

雍正六年。覆准。士子妄肆筆墨。民間造作妖言。關係人心風俗不小。嗣後士子讀書作文。惟當發揮義理。闡揚名教。其一切放誕狂妄之語。概行禁止。令該教官及地方官。嚴切曉諭。仍不時查訪。如有妄肆譏訕。侮慢聖言者。一經發覺。定將本人按律治罪。倘該教

官及地方官。不行飭查。或容隱不究者。一併嚴加議處。

又覆准。凡府學生員。原自各州縣撥入者。是名在府學。實在住居州縣。有去府二三百里者。有四五百里者。不遇考期。教官不得識面。嗣後府學生員。百里以內者。其月課仍在府學。百里以外者。在州。從州。在縣。從縣。令州縣學帶理月課。至府學生員。有干犯學規者。亦許州縣教官嚴加約束。其歲科考試。幫補。出貢。丁憂起復等項。仍歸府學職掌。



雍正七年。覆准律例內。刑名錢穀。條例無不具備。乃
涖政臨民之要務。原與經書制義並重。士子允宜奉
為章程。預先學習。以為他日敷政之本。應令各省學
政。轉飭各學教官。每當月課季考之次日。將
大清律。與之講解。但律文繁多。士子平日講習經書文藝。
勢難將律文逐條遍讀。應將律內開載刑名錢穀。關
係緊要者。詳為講解。使之熟習淹貫。預識政治之要
道。學政於按臨講書之時。令諸生各講律例三條。士
子中。果有文行兼優。而又能諳熟律例。才堪辦事者。

該教官申送學政。該學政詳加考驗。於任滿時保題。
交部帶領引

見其作何錄用之處。恭請

欽定。

又覆准。順治九年。二月內。禮部頒發

欽依刊立臥碑。又康熙四十一年。正月內。奉到

御製訓飭士子文。士子內能記憶者十無一二。應令各督撫
轉飭地方官。將

欽依刊刻臥碑。

御製訓飭士子文敬謹刊刻裝潢成帙奉藏各學尊經閣內。遇督撫等到任及學臣到任按臨於祇謁。

先師之日該教官率生員貢監等詣明倫堂行三跪九叩頭禮。教官恭捧宣讀令其拱聽。如有無故規避者行學戒飭。其有居址遙遠者令其輪班入城恭聽宣讀。至生員貢監內有唆訟抗糧緣事曾經戒飭者令其階下跪聽以示懲戒。倘該教官不實力奉行或借端需索奉行不善者許該管上司題參議處。又凡恭遇聖節元旦冬至丁祭之期其優等生員並貢監等居址附

城者皆令分班陪列行禮。稍遠者查明輪班入城學習行禮。如有高臥不赴參錯驕蹇者行學戒飭。至遇督府等官到任及學臣按試祇謁。

文廟亦令一體遵行。并飭令各教官實力奉行不得瞻徇情面亦不得借端需索。又凡新中舉人止許榜下赴宴。用鼓樂迎導外餘日概不得濫用。新中進士其旗杆禁刻龍虎等形。至進士舉貢等扁額凡有新中者除本家釘掛外其同宗通譜之家一概不得釘掛。違者許該州縣官申報督撫學政指名題參。至生員科

試優等。於鄉試前。州縣官設席禮送。止許諸生公服行禮。不得乘四轎張傘。違者。除不准入闈外。仍發學戒飭。以杜僭濫。

又覆准。嗣後生員。果係縉紳子弟。確有事故告假者。除照定例遵行外。仍令伊父兄伯叔。將隨任事由聲明。本學教官。轉詳學臣存案。倘實未隨任。濫稱隨任者。或經學臣察出。或係教官詳報。除本生照例黜革外。仍將該生父兄叔伯指名叅處。倘教官有徇庇失察等弊。一併分別議處。至有非本生父兄叔伯指稱

同族借端遊蕩者。該學嚴行禁止。概不准批行。

雍正十年。覆准舊例。學政按臨次日。祇謁

先聖畢。卽詣明倫堂講書。原係定例。嗣因雍正六年。陝西學政朱曙蓀條奏。學臣入境次日。行香講書。官吏叅謁。生員稟揖。爲弊端所由起。部覆按試次日。謁

廟行香。入場考試事竣。再詣學講書等因。通行在案。但因考試已畢。人數無多。聽講者寥寥。嗣後應仍照舊例。學政按臨次日。詣學行香。卽行講書。宣讀

聖諭。俾諸生齊集聽講。咸知訓勉。

雍正十二年。覆准舊例。有司於諸生進見。須設立門簿。如有出入衙門。乞恩網利。議論官員賢否者。許卽申呈提學官。以行止有虧革黜。又雍正八年。覆准貢生監生。亦照式設立門簿等因。俱通行在案。但所設門簿。例由各學造送。學臣鈐印。分發州縣。而州縣有司。多以學校非其專責。往往沉擱遲延。視爲具文。查知府一官。於學校考試。原有提調之責。州縣案件。無不周知。嗣後門簿。應由學臣鈐印。將諸生二字。易爲貢監生員。照式刊刻。本條全文。交與該府轉發州縣。

遇事登記。該州縣於季底申送該府。轉呈學政衙門查核。

雍正十三年。覆准講習律例。定爲考核之法。飭令各學教官。於詳報月課季考文內。將所講律例何條。其聽受者何人。逐一聲明。以憑學臣查核。如生員有怠忽。不肯盡心聽受者。令該教官。於詳報月課季考時。亦列名開報學政。該學政分別次數。嚴加懲儆。務令各生細心體認。通曉熟習。倘該教官不實力講解。仍前視爲具文者。該學政查實。卽行題叅議處。

稟獨異者。其所以不善之故。則因俗尚囂凌。漸成積習。耳之所聞。目之所見。皆剽悍桀驁之風。而無禮讓遜順之氣。遂令本然至善之性。陷溺而不自知也。其中豈無善良之人。不過自潔其身。固難以數人之力。挽風俗之澆漓。可爲浩歎。朕自臨御以來。屢頒諭旨。訓迪內外黎庶。詳明諄切。至再至三。自通都大邑。至僻壤遐陬。咸使之家諭而戶曉。而各省民俗。漸知奉法循理。不敢蕩檢踰閑。且如最難化者。莫過苗蠻犷獷之人。近亦頗知革面革心。有欣欣嚮化之意。漳泉內地之民。轉不如苗衆等之悔過遷善。革薄從

忠而甘於自暴自棄。陷身法網乎。朕心深爲不忍。特降諭旨。切加訓導。易曰。積善之家。必有餘慶。積不善之家。必有餘殃。書曰。作善降之百祥。作不善降之百殃。此言善惡感召之幾捷。於影響作奸犯科之人。旣爲王法之所不宥。必爲天理之所難容。禍福利害之間。判然兩途。然則爾等亦何所憚而不爲善。何所利而爲不善乎。大抵居鄉之道。親睦爲要。保身之道。循分爲先。毋以強凌弱。毋以富欺貧。毋以智侮愚。毋以衆逼寡。毋爲行險徼倖之事。毋爲干名犯義之行。父老子弟。聯爲一體。鄰里鄉黨。視若一家。相友相

助息訟息爭。使朝廷旌爲義鄉。有司表爲仁里。身名俱泰。刑罰不加。天下至樂至利之事。至安至適之境。無過於此。況閩省文風頗優。武途更盛。而漳泉二府人才。又在他郡之上。爲國家宣猷效力者。實不乏人。獨有風俗强悍一節。爲天下所共知。亦天下所共鄙。何不翻然醒悟。共相勉勵。而成禮義仁讓之鄉乎。著該督撫仰體朕心。時加訓戒。更立勸懲之法。實力奉行。務俾俗易風移。以副朕一道同風之至意。特諭。

又奉

上諭。各省生童。往往有因與地方有司。爭競齟齬。而相率罷考者。或經教官勸諭。或同城武弁排解。然後寢息其事。此風最爲惡劣。士爲四民之首。讀書明理。尤當祇遵法度。恪守憲章。化氣質之偏。祛凌囂之習。况國家之設考試也。原以優待士子。與以上進之階。論秀書升。遭逢令典。凡爾生童。不知感戴國恩。鼓舞奮勉。而乃以私心之忿。借罷考爲挾制官長之具。何市井無賴。至於此乎。蓋因庸懦之督撫。學臣希圖省事。草草完結。不知嚴懲。以致相習成風。士氣一驕。士品日流於下。關係非淺。各省生童等。如果該地方

官有不公不法凌辱士子等情。生童等自應赴該地方上司衙門控告。秉公剖斷。嗣後倘不行控告而邀約罷考者。即將罷考之人。停其考試。若合邑合學俱罷考。亦即全停考試。天下人才衆多。何須此浮薄乖張之輩。是乃伊等自甘暴棄。外於教育生成。即擯棄亦何足憫惜。如此定例。亦整飭士習之一端。著該部妥議通行。特諭遵。

旨議定。嗣後如地方官果有不公不法凌辱士子等情。生童等身受其害者。准其赴該管上司衙門控告。該上司秉公審理。如該地方官果有徇私枉斷。縱役辱士等

情。即將地方官題參。按其情罪之輕重。照例議處。倘係情虛。將該生童等治以誣妄之罪。倘該上司袒護地方官不行准理。或徇情營私。剖斷不公者。一經發覺。將該上司從重議處。如有豪橫之徒。逞其一時私忿。輒敢聚衆罷考。挾制官長者。不可不嚴行治罪。懲一警百。查例內福建地方。如有借事聚衆罷市罷考。打官等事。均照山陝題定光棍之例。分別治罪等語。嗣後如有聚衆罷考。挾制官長等事。審實均照此例。分別首從治罪。其逼勒同行罷考之生員。褫其衣頂。

童生記名檔案俱停考試。如合邑合學同罷考，即將合邑合學罷考生員全褫衣頂，童生全停考試。仍照例分別杖責。如該生童已經懲治之後，果能改過自新，該督撫會同學臣察實，另行具題請旨。倘有不肖學臣，市恩邀譽，輒敢仍蹈前轍，暗中寢息，或將罷考案內之人濫行收考者，該督府查叅，將該學政照徇庇例議處。倘該督撫通同徇隱，一經發覺，將該督撫一并嚴處。至該教官有教導士子之責，倘有生員等罷考，是必其平日董率無方，不能約束所致。

應將該教官照溺職例革職。倘於生童罷考之時，該教官畏懼處分，或有同城武弁與之從中調處，寢息其事者，一經查出，俱照私和公事例治罪。乾隆元年，覆准福建興泉漳等府向來士習囂凌，以鼓衆脅官爲常事。嗣後學臣考試地方，如有奸徒聚衆生事，凌脅官長等情，學臣係封鎖衙門，內外隔絕，無由禁緝。該提調及地方官并駐防武職等官，立即協拏務獲，審實查照定例內開載福建地方如有借事聚衆罷市罷考打官等事，均照山陝題定光棍之

例。分別首從治罪。若提調及地方官。事前不能預先禁止。事後又不嚴拏。及批審之後。徒以一二軟弱無辜。抵塞結案者。聽督撫學臣據實題叅。交吏部嚴加議處。武職交兵部議處。其廩保不加詳慎。濫保匪人。以致場內生事者。將該生褫革。

乾隆四年奉

上諭。據湖南巡撫馮光裕奏稱。長沙府各屬生童。因考試齊集省城。有童生赴城上乘涼。看視城外居民婦女。相向戲侮。該民李勝進城理論。經眾童生趕逐。內有攸縣

童生文良書走急。被同伴擠跌。文良書之父文德熾。捏以被毆受傷。喊稟善化縣。並未指出姓名。隨有好事童生劉樹高。謝嶽等。卽同應考多人。羣赴縣堂嚷鬧。勒逼出差查拏。次早知縣韓宗蕃。赴文良書寓所驗傷。係屬跌蹠。並非毆打。眾童生遂攔街喧闐。將所乘之轎毀壞。又復擁至府署嚷鬧。經副將等喝拏始散。又赴城上搬取磚石。打壞居民二十九戶屋瓦。臣現在飭司查審。究擬等語。前據福建巡撫王士任奏稱。福安縣生員郭向高等。倚恃青衿。抗糧藐法。率眾挾制官長。敢將文廟黷

門乘夜塗黑。以快私忿。又據直隸總督孫嘉淦奏稱。昌黎縣生員趙汝楫。控告知縣劣款種種。經知府審訊。皆虛。遂邀同邢謨烈等。欲將縣門壘砌。朕覽王士任。孫嘉淦。馮光裕。前後所奏。是數月之內。各省生童生事不法之案。已有其三。夫朝廷之所以優待士子者。以其讀書明理。立品修身。足爲庶民之坊表。且備登進之選。爲國家有用之材也。今則涼薄成風。囂凌相尚。恃列膠庠。藐視憲典。以安分爲恥。以抗法爲榮。平時號爲讀書明理者。尚且如此。愚民無知。群相則倣。其爲風俗人心之害。

何可勝言。且此等之人。伏處牖下。卽不自愛。將來倖登仕籍。必至乖戾縱肆。傲上虐民。尚望其慎守官方。砥礪廉隅。爲國家循良之吏乎。古稱稂莠不剪。則嘉禾不生。朕之嚴飭劣生者。正所以培植端人正士也。各省學政。當深知此義。時時訓誡。俾頑劣生童。改行率德。以受國恩。其蕩閑踰檢。有玷宮牆者。卽行黜革。毋得姑容。地方督撫大吏。亦當極力化導。并嚴加約束。以端士習。而厚民風。著將此旨刊刻頒布。咸使聞知。

又覆准。一應軍民人等。凡有因事聚衆。聯謀斂錢。抗

官塞署等事實有不法情形者。審明治罪。律有明條。原不應於生童人等稍爲寬假。至生童於臨考時。不得聯謀。群相萃聚。或偶與市民爭訟。輒喧播觀看。雖未有不法情事。實屬囂凌陋習。此惟在該地方官。臨時秉公辦理。或嚴行禁約。或查拏詳革。官法具在。何致過存姑息。漸滋驕玩。伏查本年六月二十四日。因湖南福建直隸生童生事。不法案內。奉有申飭士子之

諭旨。令學臣等官。時時訓誨。務俾率德改行。以受國恩。其有蕩閑踰檢。有玷宮牆者。卽行黜革。

聖訓嚴明。業經通行督撫學臣。并令刊刻頒布在案。應令該學政。與各該地方官。實力奉行。如有此等案件。卽當遵照。

諭旨。分別革懲。俾知畏法自守。并於平日諄切訓誡。務實盡其化導之責。

革。至若所犯止於戒飭。則地方官會同教官。於明倫堂。如法扑責。定例本自嚴明。乃近來有司。竟有喜怒自憑。生員或有清理田產。或呈佃戶欠租。初無他過。偶以一語牴牾。輒加呵詈。甚至不會同教官。遽命皂隸。按地痛責。殊非待士之道。有違定例。嗣後生員所犯。有應戒飭者。地方官會同教官。將事由具詳學臣。酌斷批准。然後照例在於明倫堂扑責。如有不行申詳學臣。不會同教官。而任意叱呵。甚至擅自飭責者。聽學臣查叅。以違例處分。學臣亦不得袒庇生員。違

公批斷。

乾隆三年奉

上諭。各省所有學田銀糧。原為給散各學廩生貧生之用。但為數無多。或地方偶遇歉年。貧生不能自給。往往不免飢餒。深可憫念。朕思伊等身列膠庠。自不便令有司與貧民一例散賑。嗣後凡遇地方賑貸之時。著該督撫學政。飭令教官。將貧生等名籍。開送地方官核實詳報。視人數多寡。即於存公項內。量撥銀米。移交本學教官。均勻給散。資其饘粥。如教官開報不實。給散不均。及為

吏胥中飽者。交督撫學政稽察。卽以不職叅治。至各省學租。務須通融散給。極貧次貧生員。俾沾實惠。此朕體恤生員之意。若生員等不知感激自愛。因此而干預地方。恃有生監護符。以致肆行種種不法之事。該督撫等。仍應照例查察。毋使陷於罪戾。

書籍

順治九年題准。說書以宋儒傳註爲宗。行文以典實純正爲尚。今後督學將四書五經。性理大全。蒙引。存疑。資治通鑑綱目。大學衍義。歷代名臣奏議。文章正宗。等書。責成提調教官。課令生儒誦習講解。務俾淹貫三場。通曉古今。適於世用。其有剽竊異端邪說。炫奇立異者。文雖工。弗錄。坊間書賈。止許刊行理學政治有益文業諸書。其他瑣語淫詞。及一切濫刻窗藝社稿。通行嚴禁。違者從重究治。

康熙二年覆准定例書賈止許刊行理學政治有裨
文業諸書其餘瑣語淫詞通行嚴禁違者重究嗣後
如有私刻瑣語淫詞有乖風化者內而科道外而督
撫訪實何書係何人編造指名題叅交與該部議罪
康熙二十六年覆准書肆淫詞小說刊刻出賣一百
五十餘種又假僧道爲名或刻語錄方書或稱祖師
降乩爭相附和應將此等邪教惑民諸書嚴行禁止
如有不肖之徒違禁不遵內而科道外而督撫據實
題叅該部依律治罪至私行撰著淫詞等書鄙俗淺

陋易壞人心應通行中外將私行撰著刊刻發賣者
一體詳察禁止毀其刻板如違禁不遵內而科道五
城御史嚴查題叅外而督撫令府州縣官嚴行稽查
題叅該部從重治罪凡此除該管官員外若令旁人
訐告恐致奸徒擾害良民相應不准訐告
康熙四十五年奉

上諭朕製古文淵鑑資治綱目等書俱以刷印給賞大臣此
等書籍特爲士子學習有益而製外邊人不能得此書籍
作速刊刻頒行一應書坊有情願刊刻刷印者聽其刊刻

御製朱子全書內之四書於直省并奉天府。

康熙五十二年頒

御製朱子全書內之四書於直省并奉天府。

康熙五十三年奉

上諭朕惟治天下以人心風俗為本而欲正人心厚風俗必自崇尚經學而嚴絕非聖之書此歷代所同也近見坊肆間多賣小說浮詞鄙褻荒唐瀆亂倫理不但誘惑愚民即縉紳子弟未免遊目而蠱心傷風敗俗所繫非細應即通行嚴禁在京在外所在書坊仍賣前項淫詞小說者從重

治罪。

康熙五十四年。

御纂周易折中告成頒

賜諸王大臣並

勅諭中外臣工聽其重刊以廣誦習。

雍正元年奉

上諭。

聖祖仁皇帝欽定孝經衍義一書廣博精微允宜頒布海內使觀覽誦習以為修身務學之本欽此覆准孝經衍義照

康熙五十二年頒朱子全書例給發直省刻印通行。雍正三年奏准。

聖祖仁皇帝御製律書淵源一百卷皆理數實學非天文機祥可比照重刻周易折中例。

勅諭中外臣工有情願重刊者聽。雍正八年奏准。

御纂性理精義詩經傳說彙纂書經傳說彙纂春秋傳說彙纂各刷印五十二部每一省每樣各

頒發二部一部刊刻一部磨對。

乾隆元年奉。上諭從來經學盛則人才多人才多則俗化茂稽諸史冊。成效昭然我。

皇祖聖祖仁皇帝道隆義頊學貫天人凡藝圃書倉靡不博覽而尤以經學為首重。

御纂周易折中尚書彙纂詩經彙纂春秋彙纂等編又有朱子全書性理精義正學昌明著作大備我。

皇考世宗憲皇帝至德同符孝思不匱。特勅直省布政司將諸書敬謹刊刻准士子赴司呈請刷印。



蓋欲以廣

聖教振儒風甚盛典也。乃聞各省雖有刊板。而士子刷印寥
寥。蓋由赴司遞呈以示批發。既多守候之勞。且一生所
請不過一部。斷不能因一部書。而特為發板開刷。士子
所以欲多得書。而其勢不能也。朕思諸書實

皇祖惠教萬世

皇考頒行天下之典籍。安可不廣為敷布。著直省撫藩諸臣
加意招募坊賈人等。聽其刷印。通行鬻賣。嚴禁胥吏阻
撓需索之弊。但使坊賈皆樂於刷印。斯士子皆易於購

買。庶幾家傳戶誦。足以大廣厥傳。朕又思

聖祖仁皇帝四經之纂。實綜自漢迄明二千餘年群儒之說。
而折其中。視前明大全之編。僅輯宋元講解。未免膚雜
者。相去懸殊。各省學臣。職在勸課實學。則莫要於宣揚
聖教。以立士子之根柢。每科歲按臨時。預飭各該學。確訪生
童中有誦讀

御纂諸經者。或專一經。或兼他經。著開明冊報。俟考試文藝
之後。該學政就四經中。斟酌舊說有所別異處。摘取數
條。另期發問。只令依義條答。不必責以文采。有能答不

失指者。所試文稍平順。童生卽予入泮。生員卽予補廩。以示鼓勵。務宜實力奉行。以副朕尊經育才之至意。特諭。

乾隆元年。覆准。士人讀書。必能博通經史。方爲明體。達用之學。如十三經二十一史。外省固有坊刻流傳。而單寒之士。或無力購買。以致見聞不廣。查府州縣學宮。設立尊經閣。原以藏貯書籍。而各省會俱奉旨。設有書院。亦一省人材聚集之所。則於書院并有尊經閣之處。多貯書籍。誠於

國家造就人材之道。大有裨益。但各省遠近不一。頒發頗繁。令各督撫翻刻成板。所費不貲。而士子之能刷印者。亦自無多。應令各督撫於省會書院。并有尊經閣之府州縣。動用存公銀兩。各就近將十三經二十一史諸書。購買頒發。交與各該學教官接管收貯。令士子熟習講貫。則博通經史者自多。其動用銀兩。仍報部查核。

又總理事務王大臣等議。覆僉都御史李徽條奏。一摺。奉

硃批這所奏是著交該部頒發天下學政咸使遵行欽此。
議稱看得僉都御史李徽請將孝經訂入四子書中。
請將程子顥進入大成殿二摺跡似關乎大典事實。
屬乎非經其支離荒謬殊有不可勝言者。據稱聖言。
稱經自孝經始。卽諸經亦以此稱經等語。臣等謹按。
經解名篇著於禮記。離經辨志載於曲禮。則經之名。
固已早見。至於孝經稱天之經地之義。此卽中庸之。
所謂九經。祭統之所謂禮有五經。皆舉經常之道而。
言。安得以擬議之詞。遽指爲定名之義。又稱古文孝

經。劉炫僞作。朱子亦未深考。至吳澄據許慎說文。始。
爲考證等語。臣等謹按孔安國之古文孝經。獻之秘。
府者未及施行。并許慎亦未得見。至劉炫之僞作。詳。
於隋書。辨於唐會要。見於陸德明釋文。先儒早知其。
非。不待吳澄之辨而後知也。李徽實未深考。而妄謂。
朱子亦未深考耶。又稱孝經以前六章爲根柢。中三。
章爲體要。後九章爲會通。三者人數。六者地數。九者。
天數。合爲十八章等語。臣等謹按孝經第一章。乃全。
部之綱領。猶大學之有聖經也。自天子以至於庶人。

皆以孝爲本。此天之經。地之義。民之行也。次孝治。次聖治。而歸於紀孝行者。此齊治平之必由於修身也。反是則有五刑。推此則爲至德要道。有經權常變。皆可通於神明。而復申言事君。結以喪親。則孝道純備。而宗義開明。蓋俱從第一章脉絡貫注。天地人本一理。固於數無涉。而數於孝經何涉哉。李徽所強分之數。又於天地人何涉哉。乃割截牽綴。以爲此書之精蘊。粗莽甚矣。至請以孝經同學庸訂爲一冊。自乾隆元年爲始。遇鄉會考試。卽與學庸一體命題等語。臣

等謹按四子之書。乃朱子所自訂。刊於臨漳。宋理宗始頒行學宮。至元明以及我朝。遵行已久。且大學中庸。本程子從禮記摘出。朱子訂入四書者。孝經單行。篇章復無多。如何可與四書並列。况朱子爲孝經刊誤。疑其非盡聖人之言。說得多不親切。吳澄亦曰。觀朱子所論。雖今文亦不無可疑。疑其所可疑。信其所可信。去其所可去。存其所可存。朱子意也。張恒曰。朱子識見高明。孝經出於漢初者。尚且致疑。則其出於隋世者。何足深辨。刊誤一書。姑

據溫公所注之本。非以古文優於今文也。朱子於小學書所纂孝經之文。其擇之也精矣。曷嘗盡疑孝經之非哉。此張恒跋吳澄之言也。蓋惟朱子考據精詳。諸儒亦疑信參半。特以名爲孝經。稱述孝道。殊與治道有補。此制科取士第一場首試四書文三篇。第二場首題用孝經論一篇。與性理參錯互出。所以尊崇聖經。總期發明經義。文與論何擇焉。李徽欲請訂入四書。將使天下後世。謂四書訂於朱子。五書訂於李徽乎。何其不自量也。朱子熹羽翼經傳。闡發義蘊。萃

會羣言。衷於至當。而四書集註章句親切詳明。使學者涵泳紬繹。具見先聖賢立言之精意。從此實體諸身心之間。循途而進。確有依據。庶不致高言上達。遺棄下學之功。是以我

聖祖仁皇帝特進朱子熹配入大成殿。所以爲天下萬世之學者樹之標準。俾知所趨向。非以朱子熹爲賢於周程諸儒也。若如李徽所言朱子熹旣進入大成殿。程子顥亦宜進入殿中。而周子敦頤以下。均可以次詳酌。則是周子敦頤。二程子顥。張子載。邵子雍。皆宜附

於十哲之列矣。孔子及門如南容有若子賤諸賢無
論不亞於程周諸子。且并不亞於十哲。將盡入大成
殿中乎。抑仍崇祀於兩廡乎。踵事日增。將貽後議。揆
諸尊崇

至聖以師表萬世之至意。亦豈有當哉。至於性善之說。
詳於孟子。皆淵源之論也。若以支派論。則皆性之所
發。如四端五德衆理萬善之擴充者是也。李徽乃以
人性之善。猶水之就下。乃若其情。則可以為善等句。
謂孟子言性。徵諸性之支派。殊不知乃若其情。則可

以為善。謂之支派可也。人性之善。猶水之就下。謂之
支派可乎。程子顯言繼之者善。猶水流而就下。亦溯
其淵源也。所云清濁無二水。善惡無二性。正謂善惡
雖殊。而其本則一也。故又云一加澄治。仍復其初元
之水。所謂明善以復其初也。此程子本意也。李徽乃
謂程子顯解繼之者善。亦入性之支派。且指此為有
功性旨。是不獨有悖孟子。亦大非程子意矣。臣等竊
念李徽人本樸直。亦知向正學。緣識見尚未明通。故
敷陳多有舛謬。議不可行。原無容深責。惟是學術所



關風俗攸繫。典章具在。考核宜詳。若以無干政務。不事窮詰。竊恐無知效尤。妄逞臆見。或詆毀先賢。或穿鑿經典。撫拾陳言。託名理學。以自便其私。則世道人心所係。其害將與無忌憚者等。杜漸防微。不可不慎。乾隆二年。覆准四子書。以朱註爲宗。後儒註解。辨論甚多。凡沉潛讀書之士。皆知遵守朱註。而叅證於或問語類諸書。自不致爲講章所誤。其坊刻講章。原祇爲幼學發蒙。其中不無支離。若將集註等書。另行編輯講章。亦恐難於盡善。恭照

聖祖仁皇帝御纂日講四書解義。融貫羣書。折中至當。洵可闡發聖賢之學。以昭示來者。應請

勅下內閣。每省各頒一部。令該布政司刊刻。招諭坊賈人等。刷印鬻售。廣爲流布。

乾隆三年。覆准。淫詞穢說。最爲風俗人心之害。故例禁綦嚴。或地方官奉行不力。日久法弛。致向來舊書。至今銷燬未盡。甚至收買各種淫詞穢說。公然疊架盈箱。列諸市肆。租賃與人。供其觀看。若不并行申禁。不但舊板又復刷印。且新板接踵刊行。實非拔本塞

源之計。應再通行直省督撫轉飭該地方官。凡民間一應淫詞小說。除造作刻印。定例已嚴。均照舊遵行外。凡有收存舊本。限文到三箇月。悉令銷燬。如過期不銷燬者。照買看例治罪。其有開鋪租賃與人者。照市賣例治罪。至該管官員。禁止小說淫詞。理宜實力奉行。查定例。如有違禁造作刻印者。該管官員不行查出。一次。罰俸六箇月。二次。罰俸一年。三次。降一級調用等語。是造賣小說淫詞。該管官止於失察者。久經定有處分。無庸另行定例。若該管官任其收存租

賃。明知故縱者。將該管官照禁止邪教不能察緝例。降二級調用。

又奉

上諭。從前奉

世宗憲皇帝諭旨。將

聖祖仁皇帝御刻經史諸書。頒發各省布政司。敬謹刊刻。准人刷印。并聽坊間刷賣。原欲士子人人誦習。以廣教澤也。近聞書板收貯藩庫。士子及坊間刷印者甚少。著各省撫藩留心辦理。將書板重加修整。俾士民等易於刷

印有願翻刻者聽其自便。無庸禁止。如

御纂諸書內。有爲士人所宜誦習。而未經頒發者。著該督撫

奏請頒發。刊板流布。至武英殿。翰林院。國子監。皆有存

貯書板。亦應聽人刷印。從前內務府所藏各書。如滿漢

官員。有願購覓誦覽者。概准刷印。其如何辦理之處。著

禮部會同各該處定議。請旨遵行。欽此。欽遵。覆准內務

府書板。俱藏貯

武英殿。其

武英殿所有

御製人臣儆心錄。清漢書。

聖諭廣訓。清漢書。

聖祖仁皇帝文集。漢字書。

聖祖仁皇帝詩集。漢字書。避暑山莊詩。清漢書。千叟宴詩。

萬壽盛典。周易折中。周易義例。啓蒙附論。書經傳說彙纂。詩

經傳說彙纂。春秋傳說彙纂。

日講春秋解義。倣刻宋板四書。小學孝經。清漢書。清字詩。

經性理大全。古文淵鑑。漢字書。分類字錦。駢字類編。

音韻闡微。月令輯要。韻府拾遺。子史精華。文獻通考。

紀要對數廣韻大數表小數表道德寶章資政要覽
 清文鑑蒙古合刻清文鑑蒙古字時憲法書勸善要
 言清漢書牛戒彙抄清漢書性理精義清漢書
 日知薈說
 樂善堂全集清字內則衍義漢字內則衍義

御注孝經翰林院所有清字通鑑大學衍義

日講書經

日講易經

日講四書遼史金史元史古文淵鑑三國志漢字四書解

義佩文韻府

御選唐詩釋史易經解義書經解義周易本義袖珍易經袖

珍四書孝經衍義廣羣芳譜佩文詩韻國子監除所

貯十三經二十一史書板業經

奏請重新刊刻外所有

御纂周易折中

欽定書經傳說彙纂

欽定詩經傳說彙纂

欽定春秋傳說彙纂

御纂性理精義

御纂朱子全書。古文約選。大學衍義。國學禮樂錄。近思錄。并禮部所有。

大清會典。律書淵源。俱於學術有裨。自宜廣爲傳習。今將刷印各書所需紙墨工價銀兩。逐部核定。凡滿漢官員有願購誦者。令其在各衙門具呈自備價值。概准刷印。但各種書籍名目甚多。或官員刷印多部。一時無力備價。未免難於購覓。今酌議滿漢官員有情願指俸若干。刷印書籍若干部者。由該旗該衙門查明。

移咨

武英殿等各衙門。照數給發書籍。行文戶部扣俸還項。則大小官員皆得易於購覓。以備誦覽。至

內廷書籍。外間士子無不羣思觀覽。似宜廣爲流通。請照從前頒發

御選語錄等書之例。將

武英殿各種書籍。交與崇文門監督存貯書局。准令士子購覓。以廣見聞。其書板中倘有損壞模糊者。令各該衙門備細查明。奏請修補。其各書應用紙張工價

俱逐一確估開列清單通行各該處再查
 武英殿有存貯書籍十九種俱係從前臣工遵
 旨刊刻之書其書板存貯各省臣工之家亦應開單行文各
 省督撫轉行各該處聽坊賈人等廣為刷印并准其
 翻刻以廣流傳

欽定學政全書卷之二目錄

- 文體
- 學宮事宜
- 學政事宜
- 提學按臨
- 考試事例
- 場規

發賣。如將鄉會墨卷預先召集多人。妄稱新科墨卷傳賣。及直隸各省生員。濫刻選文窻稿傳賣者。禮部及科道督撫訪查。將假造之人。如係現任官員。罰俸三箇月。未選官員。於選官日。罰俸三箇月。舉人。罰停會試一科。貢生。罰停廷試一次。監生。罰多坐監六箇月。生員。降為青衣。儒童。行令該地方官。責二十板。如有冒名私刻。坐罪假冒之人。令該地方官。責四十板。康熙二十年。覆准。查條例內。前場文章。字逾五百五十。過冗長者。不騰等語。今若照定例。恐詞意不盡。若

不限字。又恐相沿冗長。嗣後前場文章。限六百五十字。如違限例。騰錄取中。照例議處。

康熙三十一年。覆准。將直隸各省中式舉人。四書文三篇。照墨卷刊刻。進呈。

御覽頒發直省學宮

康熙三十三年。覆准。會試墨卷。亦照各省鄉墨例。刊刻四書文三篇。進呈。

御覽頒發直省學宮

雍正元年。覆准。嗣後每科鄉會墨卷。禮部會同翰林

院秉公選錄恭呈

御覽裁定直隸交與順天府尹江南交與江蘇巡撫給與情
愿刻文之人刊發流布其坊間私選一槩禁止

雍正十年奉

上諭制科以四書文取士所以覘士子實學且和其聲以鳴
國家之盛也語云言為心聲文章之道與政治通所關鉅
矣韓愈論文云惟陳言之務去柳宗元云文者所以明道
不徒務采色誇聲音而以為能也况四書文號為經義原
以闡明聖賢之義蘊而體裁格律先正具在典型可稽雖

風尚日新華實並茂而理法辭氣指歸則一近科以來文
風亦覺丕變但士子逞其才氣詞華不免有冗長浮靡之
習是以特頒此旨曉諭考官所拔之文務令清真雅正理
法兼備雖尺幅不拘一律而支蔓浮夸之言所當屏去秋
闈期近該部可行文傳諭知之特諭

雍正十三年奉

上諭文以載道與政治相通故二帝三王之盛在廷敷奏
及宣諭眾庶之言皆為謨為誥炳著六經西漢治猶近
古人心淳樸故見於文者原本經術指事類情質實曉



暢。猶有周人之遺。降及魏晉。以文滅質。漸就浮靡。六朝尤甚。姿態益工。意格益陋。文運所關。非淺鮮也。朕思學者。修詞立誠。言期有物。必理爲布帛菽粟之理。文爲布帛菽粟之文。而後可行遠垂久。若夫雕文逞辭。以炫一時之耳目。譬猶搏土揭木。塗飾丹鉛。以爲器物。外雖可覩。不移時而剝落。曷足貴耶。國家累洽重熙之日。務學績文者。正宜沐浴教化。爭自濯磨。漸進於大雅。勿尚浮華。勿取姿媚。斯於人心風俗。有所裨益。至於古人臨文。原無避諱。誠以言取足志。一存避諱之心。必輾轉囁嚅。

詞不達意。嗣後一切章疏。以及考試詩文。務期各展心思。獨抒杼軸。從前避忌之習。一槩掃除。尤宜禁者。鄉會兩試。考官每因避忌字樣。必摘取經書中吉祥之語爲題。遂使士子易爲揣摩。倩人代作。臨場抄寫。以致薄植之少年。得以倖取科名。而積學之老生。無由展抒底蘊。嗣後凡考試命題。不得過於拘泥。俾士子殫思用意。各出手眼。以覘實學。特諭。

乾隆元年奉

上諭國家以經義取士。將使士子沉潛於四子五經之書。

含英咀華。發摠文采。因以覘學力之淺深。與器識之淳薄。而風會所趨。卽有關於氣運。誠以人心士習之端倪。呈露者甚微。而徵應者甚鉅也。顧時文之風尚。屢變不一。苟非明示以準的。使海內士子。於從違去取之介。瞭然知所別擇。揣意揣摩。則大比之期。主司何以操繩尺以度羣材。士子豈能合矩矱以應搜羅乎。有明制舉之業體備各種。如王。唐。歸。胡。金。陳。章。黃。諸大家。卓然可傳。本朝文運昌明。英才輩出。劉子壯。熊伯龍。以後。作者接踵。莫不根柢經史。各抒杼軸。此皆足爲後學之津梁。制

藝之科律者。自坊選之禁。垂諸功令。而大家名作。不得通行。士子無由睹斯文之炳蔚。率多因陋就簡。剽竊陳言。襲取腐語。間以此倖獲科名。又輾轉流布。私相倣效。馴至先正名家之風味。邈乎難尋。所係非淺鮮也。今朕欲哀集有明及本朝諸大家時藝。精選數百篇彙爲一集。頒布天下。以爲舉業指南。學士方苞。工於時文。著司選文之事務。將入選之文。逐一批抉其精微奧窔之處。俾學者了然心目間。用以拳服摩擬。再會試鄉試墨卷。若必俟禮部刊發。勢必曠日持久。士子一時不得觀覽。

嗣後應弛坊間刻文之禁。倘果有學問淹博。手眼明快者。不拘鄉會墨卷。房行試牘。准其照前選刻。但不得徇情濫觴。及狂言橫議。致釀惡俗。朕實嘉惠士子。望各精勤厥業。以底大成。尚悉敬體朕意。共相黽勉。

又奏准既經奉

旨。弛坊間刻文之禁。則操選之士。自必加意搜羅。早行刊發。坊人書賈。散布流通。卽遠方邊省。亦可隨處購買。凡在應試士子。皆得及時觀覽。傳誦揣摩。以資進取。其從前禮部會同翰林院。選訂之例。相應奏明停止。

乾隆三年奉

上諭。士人以品行爲先。學問以經義爲重。故士之自立也。先道德而後文章。國家之取士也。黜浮華而崇實學。我朝養士已將百年。漸摩化導。培養甄陶。所以期望而優異之者。無所不至。爲士者當思國家待士之重。務爲端人正士。以樹齊民之坊表。至於學問。必有根柢。方爲實學。治一經。必深通一經之蘊。以此發爲文辭。自然醇正典雅。若因陋就簡。祇記誦陳腐時文百餘篇。爲弋取科名之具。則士之學已荒。而士之品已卑矣。是在各省學

欽定學政全書 卷之二
臣諄切提撕。往復訓勉。其有不率教者。卽嚴加懲戒。不可寬貸。至於書藝之外。當令究心經學。以爲明道經世之本。其如何因地制宜。試以經義。俾士子不徒視爲具文者。在學政酌量行之。務期有益於膠庠。各省亦不必一轍。我

皇祖御纂經書多種。紹前聖之心法。集先儒之大成。已命各省布政司。敬謹刊刻。聽人刷印。亦准坊間翻刻。廣行。恐地方大吏不能盡心經理。則士子購覓仍屬艱難。不獲誦讀。著督撫藩司等。善爲籌畫。將士子應讀之書。多爲

印發。以爲國家造士育才之助。

又覆准文體所趨。關乎風氣。必理醇詞正。始足以徵立言立德之本。我

世宗憲皇帝特諭考官。令所拔之文。務期清真雅正。理法兼備。又奉我

皇上諭旨。學者修詞立誠。言期有物。必理爲布帛菽粟之理。文爲布帛菽粟之文。而後可行世垂久。誠以文風士習之端倪。呈露者甚微。而徵應者甚鉅。若不按題義。摭拾子書中怪僻之語。以炫新奇。間或以此倖獲

科名致薄植之人私相倣效。而置實學根柢於不問。所係非淺鮮也。查雍正十三年內覆准。嗣後凡歲科前列十名試卷。俱令解送部科磨勘。鄉試試卷亦令九卿嚴加磨勘等因。遵行在案。是其變化之方在考拔。其懲勸之道在磨勘。誠能慎其取舍。而又嚴其甄別。文體未有不益歸醇正者。應再飭考試各官。凡歲科兩試。以及鄉會衡文。務取雅正清真。法不詭於先型。辭不背於經義者。拔置前茅。以爲多士程式。如有好爲怪異。於題義毫無發明。但抄襲子書中。人不經見之語。以妄希詭遇者。槩置勿錄。倘試官仍有濫取等弊。經磨勘官察出。卽行據實叅處。并將所取之人。分別議處。其磨勘各官。亦應照例嚴加校閱。毋得稍有瞻徇。

學宮事宜

康熙二十二年。覆准各省學租銀一萬六千六百五
 十兩零米一萬一千六百二十石零。有一省發給貧
 士將所餘以充兵餉。有一省竟不給發者。相應將學
 租銀米。行令各直省督撫。量給發廩生貧士可也。
 康熙二十七年。議准學田租賦。應給贍貧等費。務在
 嚴覈舉行。俾沾實惠。毋聽奸胥冒濫侵欺。除通查各
 學田原額若干。每年額租若干。先造清冊報部外。每
 年終將用過某費若干項。贍過貧生某人若干名。詳

開舊管新收。開除實在。造冊申明。以憑報部。如冊報
隱漏遲延。賑濟虛名無實。及教官學霸豪強之家。私
據侵占者。查出按法追究。

雍正三年奉

上諭。古有諱名之禮。所以昭誠敬。致尊崇也。朕臨御以來。恐
臣民過於拘謹。屢降諭旨。凡與御名聲音相同字樣。不必
迴避。近見各省地名。以音同而改易者頗多。朕爲天下主。
而四海臣民。竭誠盡敬如此。况

孔子德高千古。道冠百王。以正彝倫。以端風化。爲往聖繼絕
學。爲萬世開太平。自天子以至於庶人。皆受師資之益。而
直省郡邑之名。如商丘。章丘等。今古相沿未改。朕心深爲
不安。爾等會議。凡直省地名。有同聖諱者。或改讀某音。或
另易他字。其於常用之際。於此字作何迴避。一并詳議具
奏。覆准。嗣後惟祭

天於園丘丘字。不用迴避外。若府州縣地名。有同

至聖之諱者。交與內閣撰擬字樣。進呈

欽定。其山川市鎮等。交與該地方督撫詳查。更易字樣報部。
至姓氏相同者。按通考云。太公望之後。食采於謝邱。

子孫因得姓丘氏。今擬添卩旁作邱姓。至常用之際。宜從古體寫作卩字。

又奉

上諭朕以

先師孔子聖諱。理應迴避。前降諭旨。令九卿會議具奏。經九卿議覆。凡係姓氏。具加卩為邱字。凡係地名。皆更易他名。至於書寫常用之際。則從古體卩字。朕細思。今文出於古文。若改用卩字。是仍未嘗迴避也。此字本有期音。查毛詩及古文作期音者甚多。嗣後除四書五經外。凡遇此字。並

加卩為邱。地名亦不必改易。但加卩旁。讀作期音。庶乎允協。足副朕尊崇

先師至聖之意。

雍正五年。覆准。每歲上丁。致祭於

至聖先師孔子。為典甚鉅。楚省春秋二祭。惟司道府州縣等官以上。丁日行禮。而督撫學臣。則先期一日。於階下行九叩之儀。謂之祭丙。查會典並無祭丙之例。國家典禮。當從畫一。且滌器視牲。音爵奠斝。儀文甚多。今但行九叩之禮。亦未允協。應通行直省。嗣後凡省

會之區。每遇春秋二季。於上丁日。督撫學政。率司道府州縣等官。齊集致祭。不必行先期祭丙之禮。如學政考試各府。即於考試處。文廟內行禮。至各府州縣守土正印之官。率領各屬員。亦於上丁日行禮。凡滌器視牲。晉爵奠牢。一應典禮。承祭官照舊例舉行。

雍正十一年。覆准修理。

文廟學宮。原係各該地方應行經理之事。既已動用公項修葺。若不嚴其責守。則地方各官。不無草率完工。因循怠忽之處。嗣後凡府州縣

文廟學宮。有應行修理之處。該地方官據實詳報。委員確估。詳明巡撫學政。交與該州縣印官。於學租銀內。動支修理。俟完工之日。委員驗明。責令該教官敬謹守護。遇有殘缺。即會同該地方官查驗。詳明酌量修補。其府州縣官。以及教官。遇有陞遷事故。離任時。將

文廟學宮照

社稷風雲雷雨山川壇墀之例。俱入交盤項內。接任官查明。有無傾圮。出結接受。如有損壞失修之處。將印學



公明尤著者特請優陞京堂。徇私溺職者叅處。

順治九年題准。提學官須正己潔操。矢公矢慎。務得真才。不許曲徇情面。考試生員。必嚴加校閱。如有荒疎庸耄者。卽行黜退。不許姑息。有捏造流言。思逞報復者。訪實照例問遣。若鄉宦勢豪干託不遂。暗行中傷者。許徑自奏叅處治。

一。歲科兩考。定以三年內報完。方許陞轉。仍用新官面代。不許竟離地方。考試之日。務須親臨遍泣。不許移文代委。及於隔別府分調取生儒。以致跋涉爲害。

亦不許令師生匍匐迎送。考畢。卽於本地方發落。明示賞罰。不許攜帶文卷。於別處發案。致令吏書乘間作弊。士子無所勸懲。違者題叅。

一。提學官奉敕蒞督學校。各撫按二司官。不許侵伊職掌行事。提學官巡歷所屬。除教官生員干犯行止。合行嚴懲外。不許泛受民詞。侵官喜事。其生員犯罪。或事須對理者。聽該管衙門提問。不許護短曲庇。致令有所倚恃。抗拒公法。

順治十五年題准。各提學有能將上官勢要封函揭

送者於考覈時並爲敘錄。

康熙元年題准學道任滿考覈改隸吏部。

康熙十一年覆准凡新補學政不許赴席宴會。一經

領

敕次日卽行赴任。如有逗留都中赴席宴會者許科道官

指名叅處。至於各省舊任學臣考試已竣俱於十一

月內報滿到部。如違定限卽題叅議處。

康熙十八年議准提學有積習十弊。嗣後學道考核

時俱注剔除十弊。若不能剔除十弊該督撫指叅內

有貪贓之弊照例革職提問。如無貪贓等事照才力

不及例降二級調用。其考核冊內不注剔除十弊字

樣。及未曾剔除而注剔除者或吏部查出或科道糾

叅督撫照不報劣員例降三級調用。督撫有需索陋

規者亦照貪贓例處分。至上司同僚京官鄉宦私書

及親戚朋友隨住地方討情抽豐及州縣官傳遞私

書鄉紳投刺請席者係官革職係常人交刑部從重

治罪。至順天學院任滿時亦開明剔除十弊具題考

核。方准回院。若不能剔除或有貪贓等弊亦照學道

例處分。所有剔除十弊。開列於後。

童生未經府考。冊內無名。鑽求學道徑。取入學。巧圖捷便。一弊也。考試各府州縣衛所童生。額外濫取。撥發別學。明收冒籍。以占本學正額。二弊也。彌封編號印簿。及場內坐號紅簿。不發該府州縣封貯。私存道署。查對字號賄賣。三弊也。考完一府。不將紅案速行發學。任意遲延。徇私通賄。更改等第。撥下作上。四弊也。每考一處。令書辦承差快手人等。出入過付。暗訪生員。稍有家資者。先開六等草單。嚇詐保等銀兩。五

弊也。文章額少。武童額多。將文章充為武童。入學之後。夤緣改文。娼優奴隸。濫行收取。真能騎射者。擯而不錄。六弊也。各府地方。設有考棚。憚於親臨。將生童遠調考試。各州縣告病生員。扛擡驗病。困苦難堪。七弊也。縱容無賴教官。包攬生童私通線索。效勞分潤。名曰作興。大壞風教。八弊也。曲徇上司。同僚情面。并京官鄉宦私書。及親戚朋友。隨住地方。討情抽豐。孤寒之士。棄而不錄。九弊也。開報學冊。將額外濫取入學童生。未經科歲兩考。預附三等。其姓名不入新案。


造衣頂下以趙甲頂錢乙混作實在之數。朦朧禮部十弊也。

康熙二十一年覆准。嗣後學臣凡到所考地方。量撥別縣書吏供事。其掌案長接名色。嚴行禁革。按臨各府考試。例用府官點名折號。提調送考。其屬員一槩不許迎接。執事人員不許退堂傳遞關節。如遇校閱之日。一槩封筒。不許傳入。間有公事。俟試竣之日。方許開槩投進。其生童試卷。府縣除正卷外。不許多備一卷。如有此等情弊。聽該督撫據實指名題參。交與

該部從重議處。如該督撫徇情不行題參。被科道官糾參。或旁人出首。將該督撫一并議處。

又覆准。向來考試地方。各州縣官指稱供給名色。私派甚多。或按丁徵收。或逐戶科歛。每考一府。費民間數千餘金。嗣後應嚴行禁革。如各直省州縣官有私派供給名色。照舊累民者。許該督撫據實指參。交與該部從重議處。

康熙二十二年覆准。嗣後文武生員緣事黜革。及審明收復。併改歸原籍等項。該提學院道逐案開明報



金定學政全書 卷之二
部如有遺漏卽行議處。

康熙二十六年。覆准學臣缺出。無有一定。嗣後除鄉試後。第一年接任者。兩考定可無誤。毋庸議外。其第二年接任者。春夏受事。則令作速考完。如期報滿。秋冬受事。亦令如期報滿。如果未能考完。將未考地方多者。許展限五箇月。少者。展限三箇月報滿。如於第三年接任者。料理科場事務。應照例令其下次三年考試完日報滿。

康熙三十一年。覆准學臣處分。雖有定例。恐日久懈弛。將祠生贊禮。濫行批設。考試生童。徇私賄錄。至於劣衿學霸。包攬武斷者。不行究斥。行誼修明者。不爲表揚。統令該督撫題叅。交部從重議處。如督撫徇私事發。一併議處。

康熙三十九年。議准學臣考試。督撫勒索棚規。藩臬各道勒索常規。及學臣濫與者。俱革職提問。如有勢宦京官。請托投札。及教官巡捕進士舉人。說情并書吏皂快等討賞等項。事發有官者革職。無官者從重治罪。若學臣徇情市恩者。亦革職。一併提問。知府如

有包攬入學童生。要挾指勒。將文理不通之童生送考者。或學臣申報。或督撫查叅。將知府革職提問。學臣與提調知府扶同作弊者。一并革職提問。督撫不行查叅。學臣不行申報者。俱革職。又覆准。督撫如有謝考名色。及開送童生者。照勒索棚規治罪。州縣官賄薦案首。及各官效勞分肥。提鎮等官說情。并學臣扶同者。事發俱照例治罪。學臣遇有挾制干請者。准徑實封奏。

聞其祖父兄弟爲子孫營謀者。除本童責革外。祖父兄弟有官者。革職。無官者。從重治罪。

又覆准。州縣府取童生。不必限數。照常考送。如荒謬不通。故意朦混。准學臣申報核叅。其縣府兩試卷。一併解送學臣。三連對驗筆蹟。

康熙五十三年。覆准。學臣經文武兩闈後。毫無所事。閒居候代。每逾經年。翰林等官。皆於各館有修書之責。在外旣無一事。又不回館辦事。實爲曠職。嗣後鄉試年。應更換學院道。禮部將更換之處。開送吏部。將應開列之員。開列具題。差定之後。新學臣速行赴任。

舊學臣一面報滿。一面交代。即行起程。

雍正元年。覆准童生考試。由州縣送府。由府送學臣。俱加印結。方准考取秀才。行令各督撫學臣。實心奉行。嚴飭廩生。不許擅保品行不端之士。

雍正二年。奉

上諭湖廣分設湖南學政一員。湖北學政一員。

雍正三年。議准江南幅員甚廣。士子衆多。學臣多以試期迫促。併日連場。未遑盡閱試卷。照湖廣南北分考例。於安徽添設學臣。分上下兩江考試。俾各悉心

教迪。選取。

雍正四年。定各省學政一體俱為學院。

又覆准部郎等官。各有本任職掌。奉差督學後。原缺若不銓補。恐部中辦事乏人。嗣後奉差提督學政者。加以翰林院編修檢討職銜。其部內原缺。另行銓補。三年任滿。考察稱職。仍俟伊本部員缺補用。

雍正五年。覆准嗣後學院所帶吏役。酌量足用。不許冗濫。至承差號吏。亦封在場內。不許容留一人在外。所有一應收發公文。催買供應等項。悉委提調料理。

如有吏役在外招搖撞騙。許提調卽行鎖拿。從重治罪。

又奉

上諭學政一官。所以化導士習。養育人材。職任關係甚重。近年以來。各省督學諸臣。頗能仰體朕心。祇遵朕訓。矢公矢慎。杜絕苞苴。深可嘉獎。但向來學臣。恣行貪劣。以國家興賢造士之途。視為己身射利營私之地。此固本人之不肖。而亦大半由於提調官員贊成之也。其學政本性貪劣。與提調官通同作弊。固不待言。而學政之可與為善。可與為

惡者。提調官則引誘之。或挾制之。使之不得全其操守。而於其中網取厚利。此提調官之惡習。而天下之所通知者也。學政原有關防。若提調持正秉公。則學政必不能肆行無忌。學政果能公明廉潔。提調官更當敬禮而玉成之。豈可反導其為非乎。提調與學政。相為表裏。嗣後學政聲名不好。應將提調官一併議處。其如何定例之處。著九卿會議具奏。遵

旨覆准。學臣考試。凡關防啓閉。以及拆卷發案。原經提調官之手。學臣稍有營私。提調官得而察之。學政私為網

利。提調官得而揭之。乃向來竟有不肖提調官。以學政之考校爲居奇。初則餌之以美利。繼則挾以必從。把持引誘。百弊叢生。若不嚴立處分。終難盡除積習。嗣後提調官如聽學臣貪墨。通同作弊。以及引誘爲非者。一經發覺。將提調官照貪官例。同學臣一并革職。挈問。如學臣暗通關節。私鬻名器。提調官雖無通同引誘情弊。而防範不嚴。應照溺職例革職。再學政全書開載學臣按郡考試。一切應用員役。俱由提調官送用。嗣後如有猾吏奸胥。招搖撞騙。以及受賄傳

遞等弊。提調官不行訪拏究治。別經發覺。將提調官照失察衙役犯贓例議處。倘學臣操守清廉。杜絕情弊。提調官不得遂其引誘。反行挾制把持者。准學臣卽行指叅。審實。將提調官照貪官例治罪。

又奉

上諭臺灣遠隔重洋。向來督學官員。難以按臨考試。是以將學政交與臺灣道兼管。朕思道員管理地方之事。又兼學政。未免稍繁。每年旣派御史二員前往臺灣巡察。應將學政交與漢御史管理。甚爲妥協。現今御史在彼。著卽辦理。

臺灣學政。嗣後永著爲例。

雍正七年奉

上諭廣東盜案繁多。民俗獷悍。應設觀風整俗使一員。以化導訓飭。令風俗人心漸歸醇厚。又該省督撫奏稱粵東士習囂凌。未能端謹。請設學政二員。一司文衡。一飭士行。以爲造就人才之地。朕思文行本屬相關。不可離而爲二。况廣東地方遼廓。若司文司行。分屬兩員。仍各遍歷通省。耳目聞見。恐有未周。著設學政兩員。按該省地方分管考試督察。其如何分府。及一應學政事宜。著大學士會同該部

詳議具奏。廣東觀風整俗使。著焦祈年去。通省教職士子。令其兼行稽察。其添設衙門吏胥。及本員供給等項。悉照浙江福建之例行。特諭。欽此。隨經覆准。廣東學政一員。改爲廣韶學政。將廣韶南惠潮五府。并連州一州。及所屬州縣共五十二學。分與廣韶學政考試督察。添設學政一員。爲肇高學政。將肇高廉雷瓊五府。并羅定一州。及所屬州縣四十五學。分與肇高學政考試督察。


乾隆元年。覆准各部郎中等官。奉差學政。其所加編

修檢討本屬虛銜。既不便照編檢一體開列推陞。而本任之缺。業經開選。又不得與現任部員較俸陞轉。未為妥協。嗣後各部郎中。員外。主事。奉差學政者。仍照例加編修檢討職銜。將本任之缺。另行銓補外。至陞轉食俸之處。應仍就該員原官。與各部現任司員一體食俸。遇應陞之時。吏部照例推陞。具題請旨。以陞銜註冊。仍留學政之任。俟三年任滿回京。各照陞缺補用。再查郎中任滿。例應陞用道府。如遇應陞之時。准其以卽陞註冊。俟三年任滿。考核稱職。再行歸於月分。以應陞之缺卽用。

提學按臨

定例。提學按臨考試。州縣官有私派供給名色累民者。指名題叅。

一。提學出巡。半月前行巡視學校紙牌。三日前行起馬牌。各提調教官遇紙牌到。將應考生童冊籍。併應行事宜。逐一備完。府提調官遇起馬牌到。一面將各處生童數目。開揭送查。一面就近調取應考生童。可足兩場者候考。其餘俟下馬日。品搭定期。出示調取。免致官生久候。經臨地方。巡捕官量帶兵快。於交界



處防護

敕印其餘夫馬按臨伺候不得另批迎接官吏師生不許出郭迎送程途非六十里不得備辦中火每飯葷素不得過五器有驛州縣及非宿站不必另送下程吏書乘馬自行上下貼轎近行馬夫先送雨具不許近前兵快執肅靜牌二面於執事前迴避牌二面於吏書前如遇紆途曲巷預先屏人但有潛行探聽及乘機餽送吏書者即便拿究敢有容令跪道投書稟見者巡捕員役重究該州縣原係何官巡捕不許代替

如違提吏究罪按臨下馬先將巡捕官及修理衙門委官職名巡視人役姓名開揭送查

一駐劄衙門須寬大可試千餘人高垣厚壁環覆以棘不許故留水道穴隙及假墻虛壁一切弊竇吏書房不得近厨廁厨廁不得近巷市仍各總界一門以便封鎖門各異鑰鑰各異牌仍總貯一匣以便啟閉抄案門皂等房不許與外房相接須隔一墻各備行竈淨器後堂正房務整理潔淨一間安置床帳一間置淨几六張石硯筆墨水注鎮紙燈臺燭架俱全堂

上平鋪地板。公座紗厨。架高三尺。稍前。仍置小公座。以便接見。堂下置水缸二。長盤四。磁罐十。以便倒換。試場須高敞堅密。可蔽風雨。不留空隙。不纏柱結彩。堂外以甬路分東西。以千字文橫列編號。每額懸粉牌一面。大書某字號。懸燈於上。每桌前後左右相去各二尺。上置界尺。一下置溺器。一桌脚。用長竹編結。以防移動。仍貼某字幾號於桌面。盡號止。卽照桌數置籤。東西分爲二筒。每一號爲一束。又備造一冊。務要冊對籤號。籤對桌號。下馬呈遞。不許遺漏差錯。堂

左設桌二張。候放出題等書。及照出手牌三十面。旁設大雲板一架。堂右置長凳四條。圍屏二架。以便官吏暫處。堂東西壁各備出題長柄牌六面。提牌八面。小公座前置放長桌一張。鋪氈於上。北首放移席換卷。去紙說話。顧盼攬越。抗拒犯規。吟哦不完。小印十面。總盛一匣。印色俱全。中放東西文場坐號籤筒。南首留與教官用印。兩旁各設受卷條桌一張。分置各府州縣學坐牌在上。每桌各置界尺四條。呈文紙五十張。筆墨硯各一。照進長柄粉牌二面。月臺設小雲

板一架連槌在飲茶桌前。飲茶桌一張橫放。置茶四大壺。薑湯二壺。上用紙貼明開薑茶字。茶鍾六箇。冬春備火盆木炭相連。又設桌一張直放。上置飲茶小印一面。印色全。界尺四條。以便放卷。相離五尺。甬道中又設木柳一架連槌。在出恭桌前。出恭桌一張橫放。上置出恭小印一面。印色全。界尺四條。以便放卷。文場四隅各置粗壯桌一張。銅鑼四面。以備巡綽人役站立瞭望。左角門邊。席圍行竈。中備食盒。水缸。水桶及碗碟等物。合用水菜俱全。右角門邊。置淨桶四

箇。俱用蘆蓆編棚。約高四尺。上不用蓋。以便遠觀。不許附近外牆。二門內。大門外。各設大鼓一面。前堂後堂。高燈八座。甬路掛燈八盞。二門。大門。高燈各四座。二門內兩邊。暫用圍屏遮蔽。設桌凳。以備官吏輪流憩息。事畢。照數給領。其合用五經。四書。性理。通鑑綱目。及小學。武經。七書等書。教官先一日呈送。完日領回。

一。按臨下馬。執事卷損。暫止大門外。俟轎夫出。把門官吏暫閉大門。督學先入。安置印匣。巡捕官入後堂。

周視各房墻垣。封鎖書吏出堂。巡捕官同押擯官驗交卷。擯次皂隸繳執事。次掌印官送聽事員役柴燭等項。驛官送廩給鋪陳總具一冊。巡捕官搜檢收畢。仍閉門更衣升堂。各官吏師生序進。逐起稟見。各官師生行兩拜禮。舊規免拜者不稟拜。見畢。各官遞一應文冊。暮夜風雨。次日相見。見畢。官生各回不再見。巡捕官率兵快晝夜巡邏。但有沿墻窺竇拋磚擲瓦。及行走踪跡可疑者。卽挈送究。新到星相醫卜面生之人。驅逐不容留住。如違。巡捕官責治。地方歇家鄰

佑連坐。

一。按臨次日。祇謁

先師。官吏師生禮生。止於櫺星門伺候。一躬不必稟接。及沿街導引。拜畢。升明倫堂。官生以次揖。見如禮。應坐。官遵照憲綱序坐。講書生員總出班一揖。西向立。講畢。不必揖跪。以次下堂。東向立。俟行賞罰畢。官吏師生先出。不必赴謝。是日衙門投文畢。放告。巡捕官役搜檢明白。放入事不關學校者。不准。與生員有隙。故行搯扯者。責究。

一。駐劄處所。初到日。照常送米麪一次。以後發簿。照數辦送。各該調考州縣。不許另送下程。如久住處所。柴炭。油燭。及門皂柴米。俱酌定數目。五日一送。筆墨紙札。候票取方。送送進物件。巡捕官細搜。如遇考校日期。生儒供給。俱先一日送進。每名大餅六箇。水果四枚。夏月加西瓜半箇。卽置每桌上。教官仍給飯一餐。俱要精潔堪用。敢以惡濫冒破官錢。該吏坐贓問罪。各員役供給。亦先日預貯。各州縣同日考者。先期扣算。合用銀若干。會同總辦。以免偏累。事畢。通前公

費。及一應修理衙門。置辦器皿。給賞花紅紙筆之費。一并造冊。各具總數。數目若干。候起馬日。呈報。以憑查考。

一。每日辰時投文。申時領文。把門吏領出印信號簿。二扇。一扇登記發行公文。一扇遇各衙門遞到公文。先檢無磨洗拆動。夾帶私書等弊。方許登記。詳驗批文。各幾角幾件。巡捕官印驗訖二字。付原役投入。解審。補考。比銷。各隨牌入。鋪遞公文。亦照前登記。每日門吏。各注姓名備查。如員役刁難需索。許稟。挈問。其

考試閱卷之日。一應公文。俱巡捕官驗送駐劄州縣。登簿收貯。每一日總為一束。候發落完。彙開手冊送進。有批迴者。該衙門徑注收發批。候發落完日彙送。一切書札。徑自阻回。非有十分緊急公事。不許傳鼓。

考試事例

一。憲綱冊。凡不關學政者。不必槩造。其式首提調正官。次佐貳首領履歷。教官備造履歷。仍開習某經。各官下註在任公出等字。以便接見。見時免用手本。次鄉賢名宦。見在祀者。各爵里姓名行實。并奉到某督學明文。次旌獎過孝子。順孫。義夫。節婦。各姓名。年歲。籍址。行實。係何人舉報。并奉到某督學明文。次先聖先賢祠墓。次鄉士大夫。各開履歷。爵里名。號。及現任。致仕。丁憂。養病等項。及舉貢。監生。舉人。仍註某科。次

有無山林隱逸懷才抱德之士。次請舉鄉飲賓介行實姓名。及某人保舉。次射圃社學鄉約址所。教讀約正。副姓名。次學田地畝。廩房租稅數目。次本郡州縣山川圖誌。名賢著述。書籍碑刻古蹟。以上各爲一款。一格眼冊。提調官督令該學。查照舊式。將通學生員年貌籍貫三代所習經書。及某年月日入學。某年月日考取幾等幾名。中間補廩補增停降發社收復科舉。及丁憂緣事改名。給假患病等項。挨年順月。逐一明開。內廩增附青社。各以資次爲序。廩停未降者附

廩未降增附者。列增附前。增未降者。列增後。降附者。列附前。緣事者。要見曾否歸結。患病給假者。原限何時復學。丁憂者。何時服闋。累次未經歲考者。原係何因。改經改學改名者。原入何學。原習何經。原係何名。問革者。奉何衙門批問。俱要各生親筆填注。不許吏書代書。中有差錯。各生任之。惟患病給假。許吏書查實代書。候本生復學。用紙大如格眼。親書繳送。以便更貼。其武生寄學者。亦照式填注冊末。凡舊案有名。今中式。應貢。告老。病故。援例等項。未經除名者。俱明

白開欸附於冊後。上用提調印。下用儒學印。候考校牌到。一月內。差人解閱。如有錯漏增減。及隱匿事情者。教官議處。吏坐贓究革。按臨到後。有告改名改經者。一切禁止。以省混擾。

一。便覽冊。查照舊規。開造通學生員若干名。內廩增附青社等項各若干名。見在聽考若干名。丁憂患病等項若干名。必總撒相合。其前案幾等生員若干名。賞格幾何。行優行劣幾名。童生入學。儒士科舉。各若干名。送考遺才若干名。止具總數。併五科內鄉試。及

十年內所出過題目。候出巡下馬日送。

順治十五年。題准。直省儒童。止許歲試考取。其科試時。停止考取。

康熙二年。題定各直省學臣。三年內。止應考試童生一次。鄉試後。滿。凡前任學臣。已經考過一次者。勿得再考。如有前任學臣。考試未完。緣事離任者。許新學臣。將前任未考州縣生童接考。以應鄉試。如有違例重考者。聽該督撫題叅。

康熙十二年。覆准。定例三年之內。歲科兩考。查順治

欽定學政全書 卷之二
三
十八年十一月。經科臣疏請。併歲科爲一考。今三年內童子入學。府學止二十名。大學止十五名。中學止十二名。小學止七八名。據直省學臣所報文冊。各學生員三年內。每學援納事故黜革等項。約三四十名。至一百餘名不等。且三年爲時甚久。僅行考試一次。儲才不廣。督責不勤。學業易荒。應仍照順治年間舊例。三年內將生員童生。仍行歲科兩考。每學額數。俱照現行定數考取。至於滿洲蒙古漢軍。今旣俱作漢文考試。相應俱照漢人例。一體考試。

康熙四十一年內。覆准貴撫疏稱。茲當鄉試。前係學道陳正。歲試甫畢。目疾乞休。新任學道柴廷望。於本年五月初八日到任。去鄉試之期。僅三閱月。請將前道歲考一二等生員。准作科舉等語。應如所請。將歲考一二等生員。准其科舉。以應本年鄉試。至該撫所稱未經科考生員。不必再補科考之處。查生員科考。分別優劣。幫補廩增。不必遽行停止。應於鄉試後。仍照例補考。其童生。亦仍行考取。將試冊速行送部。康熙四十六年內。覆准湖督一疏。查四十一年。貴撫

疏稱鄉試之期。僅三閱月。勢不能遍行科考。請將前道歲試一二等生員。准作科舉。以應本年鄉試。事竣補行科考。取進童生。其生員未經科考者。不必再補等語。部議將歲考一二等生員。准其科舉。鄉試後。仍照例補行科考。具題准行在案。今該督既稱湖北歲試。湖南並未歲試。四十七年鄉試之期。誠恐有悞。賓與大典。應行文該督撫。新學臣到任。將未經歲試之湖南。作速考完。一二等生員。准其科舉。以應鄉試。試畢。仍將湖北湖南未經科考之生。照例補行科考。將

試冊速行送部。

此後各省學政。因鄉試期近。科考未遍。題請以歲作科者。均照此例議覆。

雍正十一年。覆准。例載凡童生州縣考試。於督學文到每府。各州縣關會一日同考。府試亦彙齊一日。以防重冒。其點名手冊。仍寫年貌。有不對者。不准收考等語。遵行在案。是府州縣之考試童生。原有點名定例。如府州縣有徇情濫縱。不肯點名。及地方豪紳劣衿。敢有倡縱鬧場之處。該學政訪聞。卽會同該督撫指名題叅。至童生院考。該學政嚴查保廩。如有假冒鎗手等情。卽將保廩照例斥革究治。

雍正十三年覆准。嗣後設有考棚之處。將現在房舍坐號。旗幟器什。造冊三本。一送學政。一存提調。一存承辦首縣。遇接任時。查明交代。如有遺失。著落典守官補還。或有應修應補之處。俱報提調。轉申學政查核。

又覆准。嗣後凡府州縣考試文武童生時。卽照學政衙門考試之例。令本籍廩生一體保結。仍於點名散卷時識認。倘有冒頂等弊。將該廩保照例黜革治罪。若府州縣官不遵定例。令廩保識認。混行錄送者。經

學政衙門糾叅。將府州縣官照混行收考例議處。又查鎗手代倩。爲學政之大弊。定例雖有嚴加懲治之條。其如何分別治罪之處。未經分晰。各省學政。或姑息草率。祇以黜革枷責從寬完結。亦未可定。若不嚴定治罪之條。終難徹底澄清。嗣後凡有代筆之鎗手。照誑騙舉監生員人等財物。指稱買求中式例。枷號三箇月。發煙瘴地面充軍。其僱倩代筆之人。照舉監生員。央浼營幹。買求中式例。發煙瘴地面充軍。知情保結之廩生。照知情不首例杖一百。再鎗手之弊多。

由包攬之徒。隨棚窩藏射利。嗣後如有包攬之人。與鎗手同罪。其窩留之家。不知情者。照不應重律治罪。倘有別情。從重科斷。其有入己贓銀者。計贓以枉法從重論。如有仍前草率完結者。該督撫卽行查叅。將該學政提調官。分別嚴加議處。

乾隆五年。奏准緣事斥革生員。除包攬詞訟。武斷鄉曲。及一切實係本身重犯。於律無可貸者。仍永行禁革外。其有因人波累。與本身事犯。情有可原。及罪在杖一百以內。革後能改過自新者。俱准以原名考試。

童生。監生。亦許以原名捐復。其舉人。貢生。有願考試者。亦照例准其一體應童子試。以圖上進。俱令取具里隣確實甘結。報明該地方官。及教官。查明加結。係應童試者。申送提學。係捐復監生者。申送撫藩。各加核實准行。如有隱匿重情。朦混濫邀者。仍應斥退。其應行收考收復者。毋許地方士庶挾嫌告訐違者。以誣告治罪。

場規

順治九年題准。試日合用員役。印卷受卷散籤給牌。官東西共二員。以精敏教官充之。供給巡綽官各一員。司儀門啓閉官一員。俱以州縣賢能佐貳。或府衛首領充之。能書吏四名。管寫題畢。以二名司茶。二名司恭。司茶者各管受卷。司恭者各管封卷。東西各能幹官二員。早司照進牌。晚收照出牌。以巡檢大使充之。厨役二名。巡綽瞭望。快手八名。分爲二班。外用巡捕官二員。以謹畏佐貳首領官充之。報門吏二名。試

日。二吏把門。二官分東西帶領民壯二十名。軍牢二十名。搜檢。仍坐名挨次派定二十對。不許那動搜檢官二員。以衛所官充之。其寫題受卷。封卷。以受卷官督理。司恭。司茶。廚役。以供給官督理。巡綽瞭望。以巡綽官督理。照進。照出。以司儀門官督理。俱先一日開具姓名手冊呈驗。仍於隔別州縣分派二班。以備臨期抽用。各員役。日午給飯一餐。候飯熟。供給官稟明二門內擊鼓三聲。督率內班皂隸。用食盒散給。以上除職官原有職守。各吏役人等。須擇忠實勤敏者。送

用。如中間有受賄傳遞等情。事發。併生童一體重究。提調官亦不得辭責。在內各員役。每名仍各與事例一本。俾將本等執事。演習慣熟。無至臨時譸張差錯。其試日。漏下五鼓。外巡兵壯。舉放三銃。以便諸生齊集。執牌吏。將生儒照次擺齊。候開門。提調官免揖。巡捕官帶民壯軍牢四十名。至儀門外。站立兩旁。次將內執事員役。搜檢點進。生員各戴頂帽。手持筆硯水注。隨牌聽點。該州縣提調官。於大門外。查照所造手冊唱名。隨牌引至儀門外。魚貫序立。搜檢官連唱仔

細搜檢。兩班齊應。二人對搜一人。搜畢。府提調官點名給卷。仍令同列辨認。互相覺察。如有懷挾片紙。隻字及金銀等物。或冒籍頂名代考者。本生照律例問罪。枷號。搜獲員役。重行獎賞。執照進牌官。引二十人。至公座前。聽點名。用隔別州縣軍壯覆搜。若搜出情弊。內搜檢員役。破格獎賞。外搜檢員役。究贓重治。印卷散籤。教官在小公座前。夾直放長桌。東西相向。照點冊唱名。本生高聲答應。隨執試卷。於東立教官桌。上用督學印一顆。西立教官。信手掣籤給本生。卽令

吏填注卷面浮票上。以防換籤。東籤者東下。西籤者西下。各認號就坐。督學不時抽查數號。如已得籤。往來行走。故不進號。及已就坐。東西觀望者。扶出黜退。進畢。內搜檢員役出。提調官。教官將原點名手冊繳入。計入考總若干名。有不到者。大書不到二字於本名卷上。一併送查。點名後方到者。抹卷扶出。巡捕官稟領大門鎖鑰。查大門內。二門外。並無一人。方從外封鎖。次司儀門官。將儀門封鎖。鎖畢。堂上擊雲板一聲。肅靜官吏。執題目牌。於甬路上下行走。俾其熟視。


短視者立稟教官將題高誦二三遍不許往就兵快輪班跼立瞭望下班者退入儀門房內凡遇各項犯規認定行次面貌擊鑼一聲高稟某號第幾桌生員犯某事本生自持卷赴堂印記二人共犯二卷同印推捱者以抗拒論黜如犯規不舉及不犯而妄稟者各員役重究已時供給官稟明二門上擊鼓三聲方許飲茶出恭飲茶者趨飲茶桌自擊小雲板一聲東坐者放卷於桌之東西坐者放卷於桌之西司茶吏印飲茶二字飲畢領卷自擊雲板二聲復位出恭者

趨出恭桌自擊木梆一聲亦各東西放卷執出恭牌由甬路中行司恭吏印出恭二字恭畢領卷自擊木梆二聲復位二生不許並出偶有並出稍後者於甬路拱立待先者復位始行攙亂者及不交卷不擊梆領牌不由中行者候恭候茶時並立接談者俱印犯規二字飲茶出恭止許一次重出者不准卷面仍印犯規二字但有一人交卷卽徹去飲茶出恭桌是日各執事員役須肅靜不許輕出一聲以亂文思惟未時大門外重擊鼓三聲堂上巡綽官接雲板三聲呼

快。騰。真。申。時。大。門。外。重。擊。鼓。四。聲。堂。上。擊。雲。板。四。聲。
呼。快。交。卷。申。末。大。門。外。重。擊。鼓。五。聲。堂。上。接。雲。板。五。
聲。不。論。已。未。騰。完。俱。交。卷。不。交。者。收。卷。扶。出。決。不。給。
燭。其。原。給。號。籤。同。卷。交。還。把。大。門。官。務。要。依。時。擊。鼓。
不。許。亂。擊。以。混。聽。聞。交。卷。時。司。儀。門。官。督。率。執。事。官。
二。員。候。立。二。門。以。一。員。收。照。出。牌。以。一。員。司。啟。閉。受。
卷。官。東。西。各。一。員。督。率。受。卷。封。卷。吏。四。名。分。立。桌。傍。
照。各。府。州。縣。座。牌。交。收。交。卷。時。本。生。卽。將。浮。票。扯。下。
帶。回。受。卷。官。每。收。一。卷。先。檢。閱。卷。面。背。如。不。扯。浮。票。

或。書。寫。姓。名。門。第。關。節。及。卷。內。夾。帶。片。紙。者。不。許。給。
牌。卽。時。稟。究。篇。數。不。完。者。印。不。完。二。字。卷。上。有。犯。規。
等。項。印。記。者。不。許。給。牌。將。卷。仍。付。本。生。執。立。堂。下。候。
出。盡。查。係。移。席。換。卷。丟。紙。者。徑。黜。退。餘。俱。分。別。責。治。
受。卷。官。一。面。督。各。吏。將。所。收。卷。每。學。以。十。卷。爲。一。束。
三。束。爲。一。封。注。明。某。學。三。十。卷。某。官。某。吏。封。送。判。收。
貯。各。卷。箱。生。員。領。牌。從。甬。道。中。直。趨。儀。門。候。三。十。牌。
足。司。儀。門。官。稟。請。銷。鑰。開。二。門。收。一。牌。方。放。一。人。如。
無。牌。者。卽。係。夾。帶。試。卷。司。儀。門。官。拘。留。稟。究。如。卷。完。

而值牌盡執卷立等已收足三十牌巡綽官公同數
 明繳上原桌高聲稟收牌訖擊鼓一聲大門外巡捕
 官亦擊鼓一聲從外開鎖門止半開逐一放出把大
 門官吏不許入限內儀門官吏不許出限外違者嚴
 究凡開大門放出如容閒人在外探聽并潛入大門
 內者各員役究贓重治生員出盡收卷官計算收過
 籤數與散過籤數有無多寡收過卷數與送考人數
 有無異同查算明確稟請點名手冊填報於後考童
 生儒士俱同生員試畢次日免謝各還寓所靜聽發
 落如發落稍遲候牌示暫回臨期調取



寬政戊午

